


DIVIS ÉTRÉ JULIAN HA SIMON.



GUERZEN.



JULIAN.

Petra hès-té, Simon ? tristet en ha cavan ;  
N'en d'ous quet quer joéius, èl ma vès liessan :  
Hà collet é hès-té argand guet er harteu,  
Pé te hès bet tabut doh dén ér filajeu ?

SIMON.

N'en dé quet en dra-zé e hra poén d'em halon :  
A houdé tri dé-zou, ne houyan mèn é on ;  
A pe za d'ein sellet er fæçon ma vihuan,  
Hemb ne chonjan jamæs ém momand dehuéhan.

JULIAN.

Tàu d'ein, fol él ma ous, guet te fal discourieu ;  
Chanjet-é te sperèd guet te chapeletteu ;  
Hum rante d'er ræson, mar hanâuès er méh,  
Pé ni ha conduyou èl ur fol dré er vréh.

SIMON.

N'en d'on quet fol, Julian, na biscoah n'en  
d'on bet,  
Meit a pe ç'hélien a béhèd de béhèd ;  
Nezé oé é telien hum guhein guet er méh,  
Nezé oé é telien bout dalhet dré er vréh.

JULIAN.

Ah ! tâu d'èin hoah ur huéh , tâu ne varbo-  
tès mui,  
Un dén én é youanquis, èl Simon me ami,  
È guïttei er harteu, festeu ha filajeu,  
È pére é cavér peb sort plijadurieu ?

SIMON.

Ne chiffès quet, Julian, forh pront ous a sperèd ;  
Cheleu petra laran, ha quemér patiantèd :  
Er hobance, en hoari, crolleu ha filajeu,  
N'en d'int meit tromperah hà scôlaj en diauleu.

JULIAN.

Lar-té d'èin-mé, Simon, penaus é ous chanjet ?  
Quènt é oès er hetan é misq er hansortèd,  
È commence en imbad, en divertissemant,  
È sônnein, é cânnèin guet ur grèd berhuidant ?

SIMON.

Dé sul de greis en noz, pe zenn ag er filaj,  
Péh léh é conduyér peb sort libertinaj,  
El loër hag er stirèd e zégassas chonj d'èin,  
Penaus é hès un Doué e zeli me jujein.

JULIAN.

Me houér é hès un Doué e zeli me jujein ;  
Me hatechim ean-memb en dès-ean disquet d'èin ;  
Mæs n'en d'on quet presset de chanjein a vuhé :  
Me hortei ur hlinhuèd, un ouaid cœuh martzéz.

SIMON.

Te lar é hès un Doué, Doué ne lar gueu erbet :  
Cheleu petra lar d'id barh er Scritur sacret :  
Maleurus èl ma ous, én noz-men martzéz,  
È vou red d'id rantein cont a te fal vuhé !

JULIAN.

Gùir é larès, Simon, mæs calet é cavan  
Quittat en imbadeu, a p'en d'on gaillartan :  
Dossein hra er galon é chonjal ér joéieu  
En dès un dén youanq é hantein er festeu.

SIMON.

Truhé e mès doh-id, me mignon bras Julian,  
Dallet-é te sperèd guet trompereaah Satan :  
Ha te repos quen æz goudé te filajeu,  
Avel pe vehès bet devot én officeu.

Petra hrès-té, Julian, pé vès arrihue ér guér ?  
Hà te pé chonj hemb quin a laret ur Batér ?  
Allas ! me Julian peur, mar bé te gorv parfæt,  
Te sperèd ne hra quin meit chonjal ér péhèd.

JULIAN.

A la fin é huélan, Simon er garanté,  
Penaus ne larès d'èin nameit er huirioné ;  
Me chanjou a vuhé, me gùitei er péhèd,  
Ha, coustet e goustou, me fal d'èin bout salvet.

Reih-mad é hanàuan n'en d'on meit ur péhour ;  
Mæs é han a vremen devad ur Hovézour :  
Pardon e houlenan ; pardon, men Doué, pardon,  
Ne m'abandonnet quet, hou pet truhé doh-on !

Quenavou, Simon peur, aveit mad trugairé,  
Quenavé te gonzeu, é oé collet m'iné ;  
Ha pèd Doué aveid on, deès liès d'em gùèlet ;  
Me yei a pe hellein, noz pé dé, d'ha cavouèt.